

08. oktober 2019

UKA2019/59/128/134

**Cannabisoliat CBD-mik (cannabidiolimik) imallit aamma annerpaamik 0,2 % THC-mik (tetrahydrocannabinolimik) imallit unioqqutitsinertaqanngitsumik pisiarinqarsinnaanngornissaannut nioqqutigineqarsinnaanngornissaannut kiisalu eqqunneqarsinnaanngornissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaq Justus Hansen, Demokraatit)

**Annerpaamik 0,2 procentimik THC-mik akulinnik cannabisimik nioqqutissiat (tassani cannabisolia aamma eqqarsaatigalugu) inerteqqutaajunnaarsinnissaannik Naalakkersuisut suliniuteqaqqullugit Inatsisartut aalajangiiffigisassaattut siunnersuut.**  
(Inatsisartunut Ilaasortaq Peter Olsen, Inuit Ataqtigiit)

**Danskit misileraanerattut ittumik nakorsat ataasiakkaat immikkut akuersissummik piniaqqaaratik nakorsaattut akuerisaanngitsumik cannabisimik nakorsaasiillutik nakorsaanissamik periarfissaqarlersillugit misileraanermik aallartitsinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut Ilaasortaq Peter Olsen, Inuit Ataqtigiit)

Partiini ilaasortat Justus Hansen Kiisalu Peter Olsen siunnersuutaat kattullugit suliassatut aalajangiiffigisassatut siunnersuutaat Siumut-minngaaniit qujassutigalugit imaattumik oqaaseqarfigissavarput.

Siumut-minngaaniit isumaqarpugut aammalu naqissuserusupparput Kalaallit Nanatta attaveqaaterput ukiuni kingullerni assut pitsannguuteqarsimaqisut. Tassanimi uagut inuttut silarsuarmi qanorsuaq kikkut qanoq suliaqarsimanerat qanorlu pissuseqarnerat ukiuni kingullerni malinnaaffigisinnaanngorsimavagut. Uani nakorsaqaarnerup tungaatigut forskerillu misissuisimanerat tungaatigut malinnaaffigineqarsinnaanngorsimavoq. Apeqqutaaginnarporlu uagut misissuinerput qanoq sumullu killeqassanersoq.

Kisiannili aamma eqqaasitsutigissavarput nakorsat suliassaminnik sulissapput uagut kaammattuisinnaavugut politikkeritut.

Nalunngisanni anaanami napparsimalersimanerata oqaatigisaa naalisarlugu oqaatigissuara. Anaanaga qallunaat nunaannut aallartariaqalermat ilagisariaqarsimavara, kræftermammi ilaqutariiusugut assut ilungersorpugut. Taamaammatt sapinngisarput tamaat anaanaatta anniarnerni ikiorniarsarisarsimavara. Anniartangaarmat kiisa pisussinnaajunnaarpoq. Pisussinnaajunnaarmat rullestolini kaassuarlugu aneeruttalerpara. Cannabisolia tusarlugu paasiniariarlugu pisiassaammatt ajoraluartumik inatsisit atuutsinneqartut unioqqutillaarlugit pisiarisariaqarsimavara anaanatta ullut tamaasa anniartuarnerminik atugaa neriullunga qaangernissaanut olia iluaqutaasinnaassasoq opperigakku. Atuleqqaarmagu sunniuteqarneranik malugisaqanngilaq, aatsaalli piffissaq sivitsormat anniartarnini qaangeriartorlugu malugisalerpaa. Naggataatigut rullestolet atorunnaarlugit pisuttaqqilerpoq.

Tassa innuttaasup napparsimasup ilaqutaasa oqaluttuaa malillugu kræftertunut sapingajalersunut allaat pisussinajunnaaraluartunut iluaqutaasimanera oqaatigineqarpoq. Tassa nunatta innuttaaniit namminneq misigisaminnik oqaluttuurtut ilaat.

Taamaammat nunamiut allat canabisolia ukiorpassuarnik atortarsimagaat iluaqutissatut aamma nunatta innuttaaniit oqaatigineqarluni uppersarsineqarpoq iluaqutaasimasoq.

Siumut-minngaaniit siunnersuuteqartut ullutsinni pisuni nappaatit assignngitsut pequtugalugit, paasisallu aasigiinngitsut nunamiut allat misissuisartuinit takussutissarisartagaat aallaavigalugit siunnersuutigineqartut taperserparput. Naalakkersuisullu suliamik aallartitsinerat peqataanerat tapersersuinerat tusaalluarlugit neriutigaarput suliat kinguarsarneqaratik naammassineqarumaartut.

Taamaammat suliat aallartinneqarsimasut soorlu naallakkersusiut pilersaaruteqarnermi oqaatigigaat siunnersuutillu tamarmik sulianut ingerlanneqartussaasut.

Taamatut oqaaseqarluta Siumut-miit siunnersuutigineqartut taperserlugit ataatsimiisitaliamut ingerlateqqinneqarnissaa kissaatigaarput. Ataatsimiisitaliarlu sulilluarnissaanni kissaallugu.

Mala Høy Kuko

Siumut